

Prefazion

Ai 26 di Lui dal 2019 la Universitât dal Friûl e dave la laurea magjistrâl ad honorem in Inzegnarie Civîl a Ezio Bortolussi, pai nivei di ecelence e inovazion che al à tocjât tal cjamp des costruzioni di ciment armât di edificis alts. Cun chest at solen, la assegnazion dal plui alt titul onorific academic, l'Ateneu furlan al ricognosseve a Ezio Bortolussi di jessi un câs esemplâr di sucès, bon di risaltâ pe sô competence ricognossude intun setôr specific dal savê.

La Universitât dal Friûl e je zovine e nassude par volontât popolâr cul fin di promovi la cressite civîl, culturâl, economiche e sociâl dal teritori, midiant la sô capacitât di gjenerâ e pandi il savê. La sô ativitât e je compenetrade di principis essenziâi come la universalitât e il valôr de cognossince, valôrs di fonde come la braûre e il sens di apartignince, la fiducie tes personis e tai propri mieçs, il coraç e la determinazion.

E po al è compit de universitât ricognossi e valorizâ cui che, fûr dal ambit academic, al rapresente e al condivî i stes principis e al contribuîs a slargjâ lis cognossincis, lavorant tal so abituâl setôr di competence o cjapant de esperience e dal propri talent personâl.

Cun chestis premessis e cjape il vie la iniziative di conferî la laurea ad honorem, un procès difcil che al previôt une sielte condividue e convinte dal cuarp docent di un dipartiment, la analisi tal detai dal curriculum vitae dal candidât di bande di grancj experts e la delibare dal Senât academic che e propon al Ministri la atribuzion dal titul.

Un percors che Ezio Bortolussi al à fat, inmò une volte, cun sucès. Cemût che al ven fûr de sô storie, al à mostrât dotis no comunis che

lu àn puartât a diferenziâsi sul plan professionâl, fasint sù (al è propit il câs di dîlu!), ancje cence un grant bagai curicolâr, une straordenarie competence inzegneristiche tignude sù di une costante ricercje de inovazion o, come che ancje lui al sotlinie, di une “gnove vie” tes costruzions.

Al à simpri dimostrât che par frontâ lis sfidis plui impuartantis al covente fâ tesaur de esperience e studiâ i câs plui dificii, ma tal stes timp vê coraç e jessi determinâts a mantignî lis propriis ideis e lâ daûr a lis propriis capacitâts.

Une prospetive tipiche di un ricercjadôr, che, pal sigûr, e à zovât aes sôs iniziativis imprenditoriâls. Ezio Bortolussi al à savût ancje cjapâ il valôr des relazions cun chei altris, che a fossin colaboradôrs o anonims beneficiaris dal so spîrt di solidarietât.

Carateristichis di un om che al pues jessi considerât un vêr esempi di chei che a àn fat grant il Friûl tal mont.

Cu la laurea honoris causa no si premin dome i sucès di une cariere ma ancje l’entusiasim e la passion che lis personis a àn dedicât al lôr lavôr. Chest al è un valôr che al va comunicât e al è di esempi e di vuide pai zovins. La laurea ad honorem no premie dome il passât ma ce che chest al rapresente pal avignî. O soi sigûr che un fuart messaç di fiducie e sperance al podarà rivâ ai nestris students de storie di Ezio Bortolussi, cul so mût di cjâlâ indevant e di frontâ la vite simpri cul cjâf in alt, e des sôs stessis peraulis: “O crôt che l’avignî al sedi fat di ideis”.

Roberto Pinton
Magnific Retôr
Universitât di Udin